

**ԵՐԻՏԱՍԱՐԴ ՀԱՅ ԱՐՎԵՍՏԱԲԱՆՆԵՐԻ  
ԳԻՏԱԿԱՆ ԱՌԱՋԻՆ ՆՍՏԱՇՐՋԱՆԸ ԵՎԳԻՏԱԺՈՂՈՎ՝  
ՆՎԻՐՎԱԾ ՄԱՐՏԻՐՈՍ ՍԱՐՑԱՆԻ ԾՆՆԴՑԱՆ 125 ԱՄՑԱԿԻՆ**

ՀՀ ԳԱԱ արվեստի ինստիտուտը 2005 թ. նոյեմբերի 16-17-ին գումարեց երիտասարդ հայ արվեստաբանների գիտական անդրանիկ երկօրյա նստաշրջանի նիստերը: Հայրենական արվեստաբանության կյանքում այս աննախընթաց ձեռնարկը համախմբեց արվեստի բոլոր բարձրագույն ուսումնական հաստատությունների, հայագիտական կենտրոնների, նաև Սփյուռքի 38 երիտասարդ հայագետ-արվեստաբանների: Գիտական նրստաշրջանի աշխատանքներին մասնակցեցին երիտասարդ գիտնականներ ՀՀ ԳԱԱ արվեստի ինստիտուտից, Երեվանի Կոմիտասի անվան պետական կոնսերվատորիայից (ԵՊԿ), Երևանի գեղարվեստի պետական ակադեմիայից, Երուսաղեմի հրեական համալսարանի հայագիտական բաժնից, Երևանի թատրոնի և կինոյի պետական ինստիտուտից (ԵԹԿՊԻ), Երևանի պետական համալսարանի հայ արվեստի պատմության ու տեսության ամբիոնից, Երևանի ճարտարապետության և շինարարության պետական համալսարանից, Հայաստանի ազգային պատկերասրահից, Գրականության և արվեստի պետական թանգարանից, այդ թվում՝ գիտության 16 թեկնածուներ:

Գիտական նստաշրջանի բացման նախօրյակին ՀՀ ԳԱԱ արվեստի ինստիտուտի տնօրինության ջանքերով լույս տեսավ նստաշրջանի զեկուցումների ժողովածուն:

Բացման խոսքով հանդես եկավ ՀՀ ԳԱԱ արվեստի ինստիտուտի տնօրեն, արվեստագիտության թեկնածու *Ա. Աղասյանը*: Նա նշեց, որ երիտասարդ հայ արվեստաբանների գիտական անդրանիկ նստաշրջանը տեղի ունեցավ մեր պետության համար հոբելյանազարդ տարում՝ 2005-ին, որը նվիրական է ՀՀ ԳԱԱ արվեստի ինստիտուտի և երիտասարդ արվեստաբանների կյանքում: Սրանից ճիշտ տասը տարի առաջ ՀՀ ԲՈՀ նախագահի հրամանով ստեղծվեց ՀՀ ԳԱԱ արվեստի ինստիտուտի՝ արվեստագիտության գծով գիտական աստիճանաշնորհման՝ հանրապետությունում միակ 016 մասնագիտական խորհուրդը: Խորհրդում են գիտական կյանքի ուղեգիր ստացել նստաշրջանին մասնակից արվեստագիտության թեկնածուները, նույն խորհրդում պիտի իրենց թեկնածուական ատենախոսություններն առաջիկայում պաշտպանեն նստաշրջանին մասնակցող ասպիրանտներն ու գիտաշխատողները:

Ողջունելով գիտական նստաշրջանի մասնակիցներին և հյուրերին՝ ՀՀ ԳԱԱ հումանիտար գիտությունների բաժանմունքի ակադեմիկոս-քարտուղար, ակադեմիկոս *Վ. Բարխուդարյանը*, կարևորելով երիտասարդ հայ արվեստաբանների առաջին գիտական նստաշրջանի անցկացման անհրաժեշտությունը, իրավացիորեն նշեց, որ այսօր պատմաբաններից և արևելագետներից շատերն իրենց գիտական առաջին մկրտությունն ստացել են երիտասարդ պատմաբանների, երիտասարդ արևելագետների՝ արդեն տասնամյակների կենսագրություն ունեցող գիտաժողովների ընթացքում: Այս առումով նա ընդգծեց ՀՀ ԳԱԱ արվեստի ինստիտուտի երիտասարդ տնօրինության ջանքերը, որոնց շնորհիվ կյանքի կոչվեց նաև երիտասարդ արվեստաբանների անդրանիկ նստաշրջանը, որը կարևոր առաքելություն ունի երիտասարդներին կրթելու գործում:

Լիազումար նիստում առաջինը ՀՀ ԳԱԱ արվեստի ինստիտուտի փոխտնօրեն-գիտքարտուղար, արվեստագիտության թեկնածու *Աննա Ասատրյանի* «Անվերջանալի ողիսական. Տ. Չուխաճյանի «Արշակ Բ» օպերայի նախերգանքը» զեկուցումն էր, որում բանախոսն առաջ քաշեց նաև Տիգրան Չուխաճյանի երկերի լիակատար ժողովածուի ակադեմիական հրատարակության կարևորության հարցը: Տաղանդաշատ գրաֆիկ Տ. Խաչվանքյանի և հայ գրաֆիկայի դասական Հ. Կոջոյանի ստեղծագործական առնչությունները բացահայտեց արվեստագիտության թեկնածու *Արթուր Ավագյանը*: Արվեստագիտության թեկնածու *Մ. Նավոյանը* ներկայացրեց «Հայ հիմներգության հեղինակի հարցը» բանախոսությունը: Արվեստագիտության թեկնածու *Ս. Նալբանդյանը* խոսեց XX դարասկզբի հայկական թատրոնում իտալական դիմակների փոխակերպման մասին:

Գիտական նստաշրջանն ընթացավ երեք մասնաճյուղերի («Կերպարվեստ և ճարտարապետություն», «Երաժշտություն» և «Թատրոն») նիստերում: Հընթացս վեց նիստերի լսվեց 30 զեկուցում:

«Կերպարվեստ և ճարտարապետություն» մասնաճյուղի 11 զեկուցումները ներկայացնում էին ինչպես միջնադարյան, այնպես էլ նոր և նորագույն շրջանի ճարտարապետության և կերպարվեստի հարցերը: Նոր Ջուղայի հայ վարպետների մանրանկարներում արևմտաեվրոպական պատկերագրական սխեմաների մասին էր Երուսաղեմի հրեական համալսարանի հայագիտական բաժնի դոկտորանտ, արվեստագիտության թեկնածու *Մ. Առաքելյանի* բանախոսությունը: Գառզուի ստեղծագործության հասուն շրջանը ներկայացրեց արվեստագիտության թեկնածու *Ա. Հովհաննիսյանը*: XII-XIV դարերի հայկական ճարտարապետության մեջ հյուսքի, աստղազարդի և շեղանկյան դերը բացահայտեց արվեստագիտության թեկնածու *Ա. Գևորգյանը*, իսկ ճարտարապետության թեկնածու *Ա. Հասրաթյանի* զեկուցումը Հայաստանի վաղ միջնադարյան պալատական համալիրների հորինվածքի ձևագոյացման մասին էր:

Կրտսեր գիտաշխատող *Մ. Կիրակոսյանը* ի մի էր բերել Փանոս Թերլեմեզյանի մտորումներն իր ուսուցիչների մասին, իսկ ԵՊՀ հայ արվեստի տեսության և պատմության ամբիոնի ասպիրանտ *Բ. Թաջարյանի* զեկուցումը նվիրված էր իրանահայ լուսանկարիչ Անթուան Խան Սևրուզիին: Գիտական նստաշրջանի հայտնությունը դարձավ Երևանի գեղարվեստի պետական ակադեմիայի ասպիրանտ *Վ. Ազատյանի* «Համաշխարհային արվեստի պատմության կայացումը և հայ արվեստի պրոբլեմները XIX դարի Գերմանիայում» զեկուցումը: Աշխույժ բանավեճեր առաջացրեցին ԵՊՀ դասախոսներ *Լ. Սարգսյանի* «Գեղարվեստական այլախոհությունը 1960-1990-ական թվականներին և հետխորհրդային շրջանի հայ կերպարվեստում» և *Ա. Սարգսյանի* «Մոդեռնիստական<sup>1</sup>, թե՞ պոստմոդեռնիստական «Ողջաբերդ» նախագիծը» զեկուցումների վիճահարույց դրույթները: Գիտական նստաշրջանի երկրորդ օրը նվիրվեց ճարտարապետության թեկնածու *Ս. Մանուկյանի* «Երաժշտություն» զեկուցումը: Այս օրը նաև ԵՊՀ դասախոս *Զ. Հակոբյանի* «Հայկական քառակող կոթողների թվագրման հարցի շուրջ» և ԵՊՀ ասպիրանտ *Լ. Միքայելյանի* «Հայաստանի վաղքրիստոնեական եկեղեցիների և անտիկ պալատական դահլիճների ճարտարապետական առնչությունները» բանախոսությունները:

«Երաժշտություն» մասնաճյուղի աշխատանքների ընթացքում լսվեց 12 բանախոսություն: Ներկայացված էին տեսական և պատմական երաժշտագիտության, երաժշտական միջնադարագիտության ու ֆոլկլորագիտության, ինչպես և արդի երաժշտության հարցերը լուսաբանող և երաժշտության պատմության վերա-

բերյալ *Ռ. Սմբատյանի, Ն. Ավետիսյանի, Ա. Խաչատրյանի, Օ. Նուրիջանյանի* գեկուցումները:

Առանձին բանախոսություններ նվիրվեցին հայ կոմպոզիտորների ստեղծագործություններին՝ ԵՊԿ ասիստենտ, արվեստագիտության թեկնածու *Ա. Ավանեսովը* բացահայտեց պոստմոդերնիզմի ազդեցությունը հայ երաժշտարվեստում: Ա. Խուդյանի թավջութակի կոնցերտներին էր նվիրված ԵՊԿ ասպիրանտ *Զ. Մխիկյանի* գեկուցումը: ՀՀ ԳԱԱ արվեստի ինստիտուտի ասպիրանտ *Մ. Ասատրյանը* բացահայտեց հնչյունի վերափոխությունները և նրա օբերտոնային սպեկտրի պոլիֆոնիկ շերտավորումներն Ավետ Տերտերյանի լարային 2-րդ կվարտետում: Լ. Աստվածատրյանի սիմֆոնիայում և «Հավիկ» պրոլոգում հայ ավանդական երաժշտական նյութի կիրառման մասին էր ՀՀ ԳԱԱ արվեստի ինստիտուտի ասպիրանտ *Տ. Շախկույանի* գեկուցումը: ՀՀ ԳԱԱ արվեստի ինստիտուտի ասպիրանտ *Լիլիթ Մարտիրոսյանը* բնութագրեց ձայների մեղեդային կայուն տարրերը: Երաժշտական ֆոլկլորագիտության ենթամասնաճյուղում ԵՊԿ ասպիրանտ *Մ. Տիգրանյանը* ընթերցեց «Թագվորածառ» գեկուցումը, իսկ *Ն. Բաղդասարյանն* անդրադարձավ XX դարասկզբի հայ կոմպոզիտորական ստեղծագործության մեջ ժողովրդական երգի խմբերգային մշակումներին: Հարմոնիայի հիմնական դրույթները XX դարի երաժշտության դիրքերից ներկայացրեց ԵՊԿ արվեստագիտության թեկնածու *Ռ. Ստեփանյանը*:

«Թատրոն» մասնաճյուղի աշխատանքների ընթացքում ընթերցվեց 7 գեկուցում: Հակոբ Պարոնյանի թատերախոսության առանձնահատկության մասին խոսեց ՀՀ ԳԱԱ արվեստի ինստիտուտի գիտաշխատող, արվեստագիտության թեկնածու *Ա. Խզմալյանը*, Լ. Շանթի «Հին աստվածներում» սիմվոլիզմի ակնարկները բացահայտեց արվեստագիտության թեկնածու *Վ. Գևորգյանը*, իսկ արվեստագիտության թեկնածու *Ա. Հարությունյանն* ընթերցեց «Աֆիշը՝ որպես թատերական ներկայացման սկիզբ» բանախոսությունը: *Գ. Վանյանը* ներկայացրեց Շեքսպիրի «Օթելլոն» Արմեն Գուլակյանի գրառումներում, *Վարդան Մկրտչյանի* գեկուցումը նվիրված էր Վաղարշ Վաղարշյանի Համլետի խաղային մանրամասներին, իսկ Գրականության և արվեստի պետական թանգարանի գիտաշխատող *Նաիրա Շահվալադյանի* բանախոսությունն էր «Ազնիվ Հրաչյայի մրցորդային դերը («Կամելիազարդ տիկինը»)»: Այս մասնաճյուղում էր ընդգրկված նաև *Ա. Համբարձումովի* «Կինոն՝ որպես ազգի հոգեկերտվածքի արտացոլում» բանախոսությունը:

Եզրափակիչ խոսքում *Ա. Աղասյանը* նշեց, որ գիտական նստաշրջանի աշխատանքները ևս մեկ անգամ փաստեցին, որ հայ արվեստագիտությունը, ի դեմս երիտասարդ արվեստաբանների, ունի հուսալի ներուժ և զարգացման մեծ հեռանկար:

\*\*\*

XX դարի հայ կերպարվեստի պատմության մեջ առանձնահատուկ է Մարտիրոս Մարյանի՝ այդ շրջանի մեր նկարչության ազգային դպրոցի հիմնադրի տեղը, որի արվեստը հայ ժողովրդի գեղագիտական ըմբռնումների, գեղարվեստական մտածողության առավել ցայտուն, խոր և ամբողջական դրսևորումներից է:

2005 թ. դեկտեմբերի 19-ին ՀՀ ԳԱԱ նախագահության նիստերի դահլիճում տեղի ունեցավ ԳԱԱ գիտաժողով՝ նվիրված ՀՀ ԳԱԱ ակադեմիկոս Մ. Սարյանի (1880-1972) ծննդյան 125 ամյակին: Գիտաժողովը եզրափակեց հոբելյարի՝ 2005 թ. ընթացքում նախատեսված հոբելյանական միջոցառումների շարքը: Բացելով գիտաժողովը՝ ՀՀ ԳԱԱ պրեզիդենտ, ակադեմիկոս Ֆ. Մարգարյանը նշեց. «Ովքեր երբևէ շփվել են Սարյանի հետ, կհաստատեն, որ Վարպետի հետ խոսելն անգամ իրենց ոգևորել է և մղել արարելու: Եվ պատահական չէր, երբ նա ընտրվեց Հայաստանի գիտությունների ակադեմիայի իսկական անդամ, դա արվեց մեծ սիրով ու նվիրումով. դա պատիվ էր ոչ միայն Վարպետի, այլև Ակադեմիայի համար, մեզ՝ բոլորիս համար»: Այնուհետև ԳԱԱ պրեզիդենտը խոսեց մեծ նկարչի մարդկային նկարագրի մասին՝ նկատելով, որ «մեծ նկարիչ լինելուց բացի, Սարյանը մեծ մարդ էր»: Հավարտ խոսքի՝ Ֆ. Մարգարյանը նշեց, որ ամբողջ կյանքում հայրենի երկրին, հարազատ ժողովրդին ու հայ արվեստին ծառայած գործիչը նաև մեծ հայ էր:

«Մարտիրոս Սարյանի գործունեության մեկ բնագավառը» գեկուցման մեջ ՀՀ ԳԱԱ ակադեմիկոս Վ. Հարությունյանն անդրադարձավ ճարտարապետական հուշարձանների պահպանության ասպարեզում Մ. Սարյանի կատարած աշխատանքին՝ կարևորելով նրա վաստակը Հայաստանի պատմական հուշարձանների պահպանության գործում, որը սկիզբ էր առել դեռևս Մոսկվայում, XX դարասկզբին, շարունակվել, երբ Վարպետը 1921-ին տեղափոխվեց Երևան, և առավել արգասաբեր դարձել 1964-ից, երբ նա ընտրվեց Պատմական հուշարձանների պահպանության հայկական ընկերության նախագահ:

ՀՀ ԳԱԱ արվեստի ինստիտուտի տնօրեն, արվեստագիտության թեկնածու Ա. Աղասյանը «Ազգային Մարտիրոս Սարյանի արվեստում» բանախոսության մեջ նշեց, որ Սարյանի ստեղծագործության ազգային դիմագծերը, գեղարվեստական լեզվի ազգային առոգանությունը չեն վրիպել ինչպես հայ, այնպես էլ օտար արվեստագետների և արվեստաբանների ուշադրությունից: Նկարիչը մեծ նշանակություն է տվել արվեստում ազգային յուրահատկությանը, բազմիցս նշել, որ «ազգայինից դուրս արվեստ չի լինում», որ «ազգայինն է արվեստը սնող հողն ու արմատը»: Միաժամանակ նա քաջ գիտակցել է, որ արվեստում չկան «ազգային ոճի» մեկընդմիջ տրված, քարացած ձևեր, որ այդ խնդիրը չի կարող լուծվել մեխանիկորեն: «Նկարիչն ապրում է հայրենի երկրում,– գրել է Սարյանը,– ապրում է՝ շրջապատված հայրենակիցներով, հայրենի բնաշխարհի մեջ: Նրա աչքը կրթվում-դաստիարակվում է այդ միջավայրում: Եվ ազգայինը, հետևաբար, յուրաքանչյուր նկարչի մոտ անհատական յուրահատուկ ձև է ստանում»: Արվեստի ազգային բնույթը, ըստ Սարյանի, պայմանավորված է նաև պատմական կոնկրետ իրավիճակով, որը տարբեր է տարբեր ժամանակներում ապրած և ստեղծագործած, թեպետև ազգային նույն մշակույթին պատկանող արվեստագետների համար: Մինչդեռ շատերը, նկարչի կարծիքով, խնդրին մոտենում են մակերեսորեն, տարբերություն գրեթե չեն տեսնում ազգայինի և ազգագրականի, բնաստեղծ ոճի և նմանակող ոճավորության միջև:

Մ. Սարյանը համոզված էր, որ ճշմարիտ արվեստագետի մոտ ազգայինը ձևավորվում, զարգանում, խորանում և, ի վերջո, նույնանում է ճշմարիտ արվեստագետի ստեղծագործական համոզմունքի, գեղարվեստական մտածողության հետ աստիճանաբար ու հիմնականում դրսևորվում ինքնաբերաբար՝ անկախ նրանից, թե որքանով է դա գիտակցում նկարիչը:

Սարյանը հասկանում էր նաև, որ ազգային լեզվով արտահայտվելու և ոչ միայն հայերի, այլև օտարների կողմից ընդունվելու համար անհրաժեշտ է յուրացնել եվրոպական նկարչության նորագույն փորձը:

Սարյանը կարևորեց «գծերի խստապարզ հստակությունը, կատարելության հասնող ձևերի ու ծավալների մոնումենտալ զսպվածությունը, բնության հետ ներդաշնակ համադրությունը», իսկ նկարչության ու ժողովրդական արվեստի մեջ՝ «գույների պարզությունը և գեղարվեստական ձևի ընդհանրացումը»: Նկարիչն առաջնորդվում է գույնի և գծի առավել պարզեցման սկզբունքով:

Ա. Աղասյանը կարևորեց 1909 թվականը, երբ նկարիչը վերջնականորեն հրաժարվեց հեքիաթային-կիսաֆանտաստիկ թեմաներից ու մոտիվներից, գեղարվեստական կերպավորման սիմվոլիստական եղանակներից և դեկորատիվ-մաներային, գծային-օրնամենտալ ոճավոր լեզվից ու ստեղծեց իր առաջին գլուխգործոցները՝ «Ինքնանկարը» (երկու տարբերակով) և «Վազող շունը»:

1910-1913 թվականներին դեպի Արևելք Սարյանի կատարած ուղևորությունների ընթացքում նրա արվեստն է՛լ ավելի է կատարելագործվում: Նախորդ շրջանում դեռ նոր նշմարված մոնումենտալ-դեկորատիվ միտումը բյուրեղանում, առավել հստակ ու արտահայտիչ ձև է ընդունում՝ «Փողոց: Կեսօր: Կոստանդնուպոլիս» (1910), «Քայլող կինը» (1911), «Փյունիկյան արմավենի» (1911): Նկարչի արվեստն առաջին հերթին մոնումենտալ նոր շունչ է առնում: Սարյանի 1910-ական թվականների կտավներում համաշխարհային նոր նկարչության մեջ առաջին անգամ Արևելքը ներկայանում է ռեալիստական այդչափ համոզիչ, կենդանի տեսքով: Հայաստանում Սարյանի արվեստը կենսական հզոր ազդակներ ստացավ ու ազգային ցայտուն գծերով օժտվեց: Այսուհետ նկարչի ստեղծագործության եթե ոչ միակ, ապա գլխավոր թեմաներն են դառնում վերածնվող հայրենիքը, հայրենի բնաշխարհը, խաղաղ երկնքի տակ ստեղծագործ կյանքով ապրող հայ ժողովուրդը: 1920-ական, ապա 1950-ական թվականներին կերտած Հայաստանի հավաքական կերպարը, նրա բնորոշ տեսարանները հեռավոր ու բարձր դիտակետերից, լայն ու ընդարձակ համապատկերով ներկայացնող կտավներում («Հայաստան», 1923, «Լեռներ: Հայաստան», 1923, «Արագած», 1926, «Քարինջ գյուղը Թումանյանի լեռներում», 1952, «Լավվար», 1952, «Հոկտեմբերյան բնանկար», 1953 և այլն) նկարչին վերջապես հաջողվել է գեղարվեստական ձևն ու կերպարային բովանդակությունը բերել կատարյալ համաձայնության, դրանք ամբողջությամբ թափանցել ազգային ոգով, իսկապես հասնել «ռեալիզմի նախահիմքերին», - եզրափակելով գեղուցումը՝ նշեց Ա. Աղասյանը:

ՀՀ ԳԱԱ արվեստի ինստիտուտի կերպարվեստի բաժնի վարիչ, արվեստագիտության դոկտոր Վ. Ղազարյանի «Մարտիրոս Սարյանը և միջնադարը» բանախոսությունը մի կողմից՝ Սարյանի հայացքների ու նկարչության, իսկ մյուս կողմից՝ միջնադարյան գեղագիտության ու արվեստի միջև զուգահեռների բացահայտման մասին էր: Դրանցից են պայծառ գույներն ու դրանց կարևոր կենսական նշանակությունը թե՛ Սարյանի և թե՛ միջնադարյան հայ արվեստում, դրանց դիտումը իբրև արարչական գործունեության ընկալում, միջնադարյան մանրանկարչությանը բնորոշ գունային կոնտրաստների և մոնումենտալության վերահայտնագործումը և զարգացումը Սարյանի արվեստում:

Հաջորդ «Մարտիրոս Սարյանը և Ռուսաստանը» գեղուցման մեջ Մ. Սարյանի տուն-թանգարանի տնօրեն Ռ. Սարյանը նկատեց, որ Սարյանը մեծապես կապված էր Ռուսաստանի և ռուսական կերպարվեստի հետ թե՛ գործունեությամբ, թե՛ ստեղծագործությամբ: «Մասնագիտական կրթությունը ստանալով

Մոսկվայի գեղարվեստի ուսումնարանում՝ վարպետության դասեր առած Սերովի և Կորովինի պես մեծագույն նկարիչների մոտ, նա եղավ մեկն այն երիտասարդ նկարիչներից, որն առաջ մղեց XX դարասկզբի ռուսական արվեստը դեպի նորն ու առաջադեմը: Վարպետը գործել է ռուս մշակույթի «արծաթյա դարի» փայլուն ներկայացուցիչների կողքին, ստեղծել ռուս անվանի դեմքերի դիմանկարների անգուգական պատկերասրահ: Ռուս մշակույթի զարգացման մեջ Սարյանի ներդրումը բարձր են գնահատել ռուս նկարիչներն ու արվեստաբանները, «արժեքավորել նրա արվեստի ազգային նկարագիրը, ուրույն ոճն ու անկրկնելի ներկայակերը»:

Արվեստագիտության թեկնածու Ա. Սարյանը գեղանկարչության և երաժշտության աղերսները քննության առավ հայր և որդի Սարյանների կողմից գույնի և հնչյունային գույնի կարևորության, գաղափարագեղարվեստական հայեցակարգային ըմբռնումների, արտահայտչամիջոցների օգտագործման յուրատիպ մեթոդի և ազգայինի դրսևորման տեսանկյուններով: Բանախոսը կոմպոզիտորի «Հայաստան» սիմֆոնիկ պաննոյի, սիմֆոնիայի և N 2 կվարտետի վերլուծությամբ ներկայացրեց կոմպոզիտոր Դ. Սարյանի երաժշտությանը բնորոշ աշխարհընկալման, հնչյունային մտածողության, արտահայտչամիջոցների սեղմ օգտագործման և ազգային ուղղվածության առանձնահատկությունները, որոնք ձևավորվել են Մ. Սարյանի գեղանկարչության ազդեցությամբ: Հայր և որդի Սարյանների ստեղծագործության գեղարվեստական, գեղագիտական և այն մարմնավորող արտահայտչաձևերի համակարգի ամբողջականությամբ դրանք գնահատվում են որպես ազգային ավանդական արվեստի լավատեսական կենսափիլիսոփայությունը ժառանգած ստեղծագործություն:

Սարյանի գեղանկարչության և Իսահակյանի բանաստեղծության միջև հիմնական ուղենշային ընդհանրության բացահայտման մասին էր բանասիրական գիտությունների դոկտոր Ա. Իսահակյանի «Մարտիրոս Սարյան և Ավետիք Իսահակյան. աշխարհի բանաստեղծական ըմբռնումը» գեկուցումը: Դա երկու վարպետների խորապես ազգային էությամբ օժտված, անսահման հայրենասիրությամբ ներծծված աշխարհի բանաստեղծական ըմբռնումն էր: Թեև Սարյանն ու Իսահակյանը գործել են հայ մշակույթի տարբեր բնագավառներում, այդուամենայնիվ, զարմանալիորեն հոգեհարազատ են միմյանց և ներդաշնակ:

Մեծ վարպետի սան, ՀՀ վաստակավոր նկարիչ Ա. Գրիգորյանն «Իմ ուսուցիչը» բանախոսության մեջ ներկայացրեց դրվագներ իր և Վարպետի առավել քան քառորդ դար տևած շփումներից:

ՀՀ ԳԱԱ արևելագիտության ինստիտուտի տնօրեն, պատմական գիտությունների դոկտոր Ն. Հովհաննիսյանը պատմեց հետաքրքիր պատահիկներ՝ վարպետի հետ ունեցած երեք հանդիպումների մասին անմոռանալի հիշողություններից:

Գիտաժողովում որոշվեց տպագրության նախապատրաստել գիտաժողովում ընթերցված գեկուցումների ժողովածուն:

**ԱՍՍՏՐՅԱՆ Ա. Գ.**

Արվեստագիտության թեկնածու